

四庫全書

史部

欽定四庫全書

史部

明史卷二百十一

給事中<sub>臣</sub>劉湄覆勘

總校官編修<sub>臣</sub>朱 鈐

欽定四庫全書

明史卷二百十一

大學士張廷玉等奉 敕修

列傳第九十九

馬永

梁震 祝雄

王效

周尚文 趙國忠

馬芳

孫林 孫炳燝

何卿

沈希儀

石邦憲

馬永字天錫遷安人。生而魁岸驍果，有謀習兵法。好左氏春秋，嗣世職為金吾左衛指揮使。正德時，從陸完擊賊有功，進都指揮。同知江彬練兵西內，永當隸彬。稱疾避之，守備遵化。寇入馬蘭峪，參將陳乾被劾，擢永代戰。柏崖、白羊峪皆有功。十三年，進都督僉事，充總兵官，鎮守薊州。盡汰諸營老弱，聽其農賈，取傭直給健卒。由是永所將獨雄於諸鎮。武宗至喜峰口，欲出塞，永叩馬諫。帝注視久之，笑而止。中路擦崖當敵衝，無城堡耕牧者。

輒被掠永令人持一月糧營崖表版築其內城廨如期  
立乃遷軍守之錄功進署都督同知嘉靖元年金山礦  
盜作亂遣指揮康雄討平之塞其礦朶顏巴爾斯結諸  
部邀賞不得盜邊永迎擊洪山口而伏兵斷其後斬獲  
過當進右都督已復馘其驍將巴爾斯不敢復擾邊大  
同兵變殺巡撫張文錦命桂勇為總兵官往鎮而議將  
撫之永言逆賊干紀朝廷赦其脅從恩至渥也顧猶抗  
命今不勦春和北寇南牧叛卒勾連禍滋大宜亟調鄰

鎮兵尅期攻城曉譬利害懸破格之賞令賊自相斬為  
功元凶不難殄也乃命永督諸軍與侍郎胡瓚往會亂  
平乃還鎮永上書爲陸完請恤曲且乞宥議禮獲罪諸  
臣帝大怒奪永官寄祿南京後府巡撫御史邱養浩言  
永仁以恤軍廉以律已固邊防却強敵軍民安堵資彼  
長城聞永去遮道乞留且攜子女欲遂逃移夫陸完久  
死炎瘴非有權勢可托永徒感國士知欲效區區之報  
不負知己寧負國家祈曲賜優容俾還鎮順天巡撫劉

澤及給事御史交章救之俱被譴永竟廢不用永杜門  
讀書清約如寒士久之用薦僉書南京前府大同軍再  
亂廷臣交薦召至已就撫復還南京十四年遼東兵變  
罷總兵官劉淮以永代之太清堡守將徐顥誘殺大寧衛  
九人部長巴爾達噶怒冠邊永擊斬之其族屬博遜借  
朵顏兵報讐復為永所却已復入犯中官王永戰敗永  
坐戴罪遼東自軍變後首惡雖誅漏網者衆悍卒無所  
憚結黨叫呼動懷不逞廣寧卒佟伏張鑑等乘旱饑倡

衆為亂諸營軍憚永無應者伏等登譙樓鳴鼓大譟永率家衆仰攻千戶張斌被殺永戰益力盡殲之事聞進左都督永畜士百餘人皆西北健兒驍勇敢戰遼東變初定帝問將於李時時薦永且曰其家衆足用也帝曰將須文武兼寧專恃勇乎時曰遼士新定須有威力者鎮之至是竟得其力都御史王廷相言永善用兵且廉潔宜仍用之薊鎮作京師藩屏未及調卒遼人為罷市喪過薊州州人亦灑泣兩鎮竝立祠永為將厚撫間謀



得敵人情偽故戰輒勝雅知人所拔卒校後多至大帥  
尚書鄭曉稱永與梁震有古良將風

梁震新野人襲榆林衛指揮使嘉靖七年進署都指揮  
僉事協守寧夏興武營尋充延綏遊擊將軍廉勇好讀  
兵書善訓士力挽彊命中數先登擢延綏副總兵與總  
兵官王效却敵鎮遠關進都督僉事濟農諳達犯延綏  
震敗之黃甫川尋犯響水波羅參將任傑大敗之濟農  
復以十萬騎入寇震大破之乾溝獲首功百餘先後被

獎賚已增俸一等乾溝凡三十里當敵衝震濬使深廣築土牆其上寇不復輕犯十四年進都督同知充陝西總兵官尋論黃甫川功進右都督明年移鎮大同大同亂兵連殺巡撫張文錦總兵官李瑾繼瑾者魯綱威不振兵益驕文武大吏不敢要求廷議以為憂移震往震素畜健兒五百人至則下令軍中申約束鎮兵素憚震由是帖服寇入犯震破之牛心山斬級百餘寇憤駐近邊伺隙時車駕祀山陵震伏將士於諸路寇果入大破

之宣寧灣又破之紅崖兒斬獲甚衆進左都督廕一子  
百戶震父棟前陣亡震辭廕子乞父祭葬帝嘉而許之  
毛伯溫督師與震修鎮邊諸堡不數月工成卒贈太子  
太保賜其家銀幣加贈太保謚武壯震有機畧號令明  
審前後百十戰未嘗少挫時率健兒出塞劫敵營或議  
其啟釁震曰凡啟釁者謂寇不擾邊我橫挑邀功也今  
數深入乃不思一挫之耶震歿健兒無所歸守臣以聞  
編之伍邊將猶頗得其力代震者遼東祝雄起家世廕

歷都督僉事自山西副總兵遷鎮大同被劾解職起鎮  
薊州善撫士治軍肅寇入塞率子弟為士卒先子少却  
行法不貸世宗書其名御屏為將三十年布袍氈笠不  
異卒伍既歿遺貲僅供殮具薊人祠祀之

王效延綏人讀書能文辭嫻韜畧騎射絕人中武會試  
嘉靖中累官都指揮僉事充延綏右參將出神木塞擣  
寇尚納山斬獲多尋擢延綏副總兵十一年冬進署都  
督僉事充總兵官代周尚文鎮寧夏濟農犯鎮遠關效

與梁震敗之柳門追北蜂窩山蹙溺之河斬首百四十  
有奇璽書獎賚濟農十萬騎復窺花馬池效震拒之不  
得入轉犯乾溝震分兵擊遂趨固原總兵官劉文力戰  
寇趨青山峴大掠安定會寧效方敗別部於鼠湖追至  
沙湖疾移師往援破之安定再破之靈州先後斬首百  
五十餘級總制三邊尚書唐龍以大捷聞而巡按御史  
奏諸將失事罪給事中戚賢往勘奏安會二縣多殺掠  
大當罪然麾下卒僅八千倍道蒙險撓八九萬方張之

寇殊死戰宜以功贖震乾溝效鼠湖沙湖安定靈州之戰以孤軍八百當寇萬餘功俱足錄龍亦善調度詔大奪職震效賚銀幣龍一子入監是役也功多執政尼之故賞薄御史周鈇以為言龍效震各加一級效進都督同知尋以清水營功進右都督寇以輕騎犯寧夏效伏兵打鎧口俟其半入橫擊敗之而防河卒復以戰艘邀斬其奔渡者捷聞進左都督寇憤設伏誘敗之貶右都督十六年移鎮宣府踰年卒謚武襄效言行謹飭用兵

兼謀勇威名著西陲與馬永梁震周尚文並為名將劉  
文者陽和衛人襲指揮同知屢遷署都督僉事涼州右  
副總兵嘉靖八年以總兵官鎮陝西大破洮岷叛番若  
婁巴爾諸族斬首三百六十有奇十一年寇西掠還將  
犯寧夏河東文擊破之積前功進都督同知後落職起  
鎮延綏改甘肅卒亦謚武襄

周尚文字彥章西安後衛人幼讀書粗曉大義多謀畧  
精騎射年十六襲指揮同知屢出塞有功進指揮使寘

鐫反遏黃河渡口獲叛賊丁廣等推掌衛事關內回賊  
四起倚南山尚文次第平之御史劉天和劾中官廖當  
繫詔獄事連尚文拷掠令引天和終不承久之始釋已  
守備階州計禽叛番進署都指揮僉事充甘肅遊擊將  
軍嘉靖元年改寧夏參將尋進都指揮同知為涼州副  
總兵御史按部莊浪猝遇寇尚文亟分軍擁御史而自  
引麾下射之寇乃遁嘗追寇出塞寇來益衆尚文軍半  
至麾下皆恐乃從容下馬解鞍背崖力戰所殺傷相當



部將丁果來援寇始退尚文被創甚乃告歸尋起故官  
濟農數踏冰入尚文築牆百二十里澆以水冰滑不可  
上冰泮則令力士持長竿鐵鈎鈎殺渡者九年擢署都  
督僉事充寧夏總兵官王瓊築邊牆尚文督其役且濬  
渠開屯軍民利之寇掠西海過寧夏巡撫楊志學議發  
兵邀尚文不從劾解職久之起山西副總兵寇由偏頭  
關趨岢嵐尚文轉戰三百里破之與子君佐俱傷賚銀  
幣尋以總兵官鎮延綏寇犯紅山墩力戰敗之被賚濟

農復大掠清平堡坐奪俸尚文優將才負氣桀傲所至  
與文吏競文吏又往往挫折之以故彌不相得巡撫賈  
啟勅尚文老諱兵部請調之甘肅帝不從各奪其俸巡  
按張光祖言兩人必不可共處乃革尚文任亦貶啟秩  
濟農大入抵固原天和時已為總督激尚文立功奮擊  
之黑水苑殺其子號沙什王者獲首功百三十餘乃以  
為都督同知二十一年用薦為東官廳聽征總兵官兼  
僉後府事嚴嵩為禮部尚書子世蕃官後府都事驕蹇

尚文面叱將劾奏之嵩謝得免調世蕃治中以避尚文  
銜次骨其秋以總兵官鎮大同請增餉及馬兵部言尚  
文陳請過當方被詔切責而尚文與巡撫趙錦不協乞  
休弗允日相構御史王三聘乞移之他鎮廷議大同敵  
衝尚文假此避不宜墮其奸謀乃以錦為甘肅巡撫濟  
農數萬騎犯前衛尚文與戰黑山殺其子瑪哈岱追至  
涼城斬獲多進右都督己寇由宣府逼畿甸出大同塞  
而北尚文邀之稍有俘獲後寇復大舉犯鵲鴿峪將南

下尚文備陽和遣騎四出邀寇寇遁賜敕獎勞之總督  
翁萬達議築邊牆自宣府西陽和至大同關山口延袤  
二百餘里以屬尚文乃益築陽和以西至山西了角山  
凡四百餘里敵臺千餘斥屯田四萬餘頃益軍萬三千  
有奇帝嘉其功進左都督加太子太保永除屯稅叛人  
充灼召小王子寇邊尚文偵得其使者加太保蔭子錦  
衣世千戶終明之世總兵官加三公者尚文一人而已  
初諳達及濟農諸子盛強諸邊歲受其患大同尤甚自

尚文蒞鎮與總督萬達巡撫詹榮規畫戰守備邊民息  
肩者數年尚文益招叛人孤敵勢歸者相屬二十七年  
八月諳達伏兵五堡旁誘指揮顧相等出圍之彌陀山  
尚文急督副總兵林椿參將呂勇遊擊李梅及二子君  
佐君仁出塞援圍始解相及指揮周奉千戶呂愷郝經  
等已陣歿尚文轉戰次野口伏突起殊死戰斬其長一  
人相持月餘乃引去尚文設伏殺其殿卒而還尚文三  
子俱罪戍至是以父功得釋諳達數萬騎犯宣府萬達

檄尚文大破之曹家莊錄功兼太子太傅賜賚有如其  
年卒年七十五尚文清約愛士得士死力善用間知敵  
中曲折故戰輒有功自二十年後諳達頻擾邊宿將王  
效馬永梁震皆前死惟尚文存威名最盛嚴嵩父子謀  
傾陷功高帝方籍以抗強敵讒不得入暨卒格恤典不  
予給事中沈束以為言嵩激帝怒錮束詔獄穆宗立始  
贈太傅謚武襄趙國忠字伯進錦州衛人嗣指揮職嘉  
靖八年舉武會試進都指揮僉事守備懷陽擢錦義右

參將連破敵增秩賜金幣進署都督僉事為遼東總兵  
官禦敵有功斬級百七十有奇進都督同知賜賚踰等  
敵以八百騎從鴉鵲關入都指揮康雲戰歿裨將三人  
亦死詔國忠戴罪立功已坐事被劾命白衣視事守備  
張文瀚禦敵死國忠坐解任尋起西官廳右參將授都  
督僉事提督東官廳諳達大舉犯宣府總兵官趙卿不  
任戰命國忠代之至全道寇已為周尚文所敗東走國  
忠命參將孫勇率精卒逆擊於大滹沱敗之與尚文分

道擊寇盡走以功受賚復坐寇入降俸二等諱達薄京師國忠趨入衛壁沙河北已移護諸陵寇騎至天壽山見國忠陣紅門前不敢入三十一年再鎮遼東小王子達喇蘇以數萬騎寇錦州國忠禦却之明年入獅子口督參將李廣等逐出塞斬禽五十人寇屢入榆林堡高臺蛤利河先後掩擊獲首功百五十有奇進秩一等尋被論罷國忠善戰射穿札為將有威嚴厯兩鎮繕亭障練士馬邊防賴之



馬芳字德馨蔚州人十歲為北寇所掠使之牧芳私以曲木為弓剡矢射諳達獵虎虢其前芳一發斃之乃授以良弓矢善馬侍左右芳陽為之用而潛自間道亡歸周尚文鎮大同奇之署為隊長數禦寇有功當得官以父貧悉受賞以養嘉靖二十九年秋寇犯懷柔順義芳馳斬其將授陽和衛總旗寇嘗入威遠伏驍騎鹽場而以二十騎挑戰芳知其詐用百騎薄伏所三分其軍銳以次擊之奮勇跳盪敵騎辟易十里斬首凡九十級已

復禦之新平寇營野馬川克日戰芳度寇且遁急乘之  
斬級益多衆方賀芳遽策馬曰賊至矣趣守險而身斷  
後頃之寇果麇至芳戰益力寇乃去亡何戰泥河復大  
破之累遷指揮僉事以功進都指揮僉事充宣府遊擊  
將軍復以功超遷都督僉事隸總督為參將戰鎮山墩  
不利奪俸已襲寇有功進二秩為右都督尋以功進左  
賜蟒袍偏裨加左都督自芳始也三十六年遷薊鎮副  
總兵分守建昌土默特十萬騎薄界嶺口芳與總兵官歐

陽安斬首數十獲驍騎蒙克圖等六人寇不知芳在芳  
免胄示之驚曰馬太師也遂却捷聞廕世總旗未幾錫  
林阿巴圖爾入躡遵化玉田芳追戰金山寺有功而州  
縣破殘多總督王忬以下俱獲罪芳亦貶都督僉事尋  
移守宣府寇大入山西芳一日夜馳五百里及之七戰  
皆捷已復為左都督就擢總兵官以功進二秩寇薄通  
州芳入衛令專護京師寇退再進一秩尋與故總兵劉  
漢出北沙灘搗寇巢已坐寇入令戴罪四十五年七月錫

林阿以十萬騎入西路芳迎之馬蓮堡堡圯衆請塞之不可請登臺亦不可開堡四門偃旗鼓寂若無人比暮野燒燭天囂呼達旦芳臥日中不起敵騎窺者相屬莫測所為明日芳蹶然起乘城指示衆曰彼軍多反顧且走勒兵追擊大破之隆慶初或為錫林阿謀以五萬騎犯蔚州誘芳出而以五萬騎襲宣府城可得志芳豫伐木環城寇至不可上遂解去頃之率參將劉潭等出獨石塞外二百里襲其帳於長水海還至塞追者及鞍子

山迎戰又大敗之廕子千戶芳有膽智諳敵情所至先士卒一歲數出師搗巢或躬督戰或遣裨將家蓄健兒得其死力嘗命三十人出塞四百里多所斬獲寇大震芳乃帥師至大松林頓舊興和衛登高四望耀兵而還時大同被寇視宣府尤甚總督陳其學恐擾畿輔令總兵官趙奇扼紫荆關寇乃縱掠懷仁山陰間奇坐貶三秩遂調芳與易鎮諳達轉犯威遠幾破會其學率胡鎮等救而芳軍亦至相拒十餘日乃走芳謂諸將曰大同

非宣府比與我間一牆耳寇不時至非大創之不可乃將兵出右衛戰威寧海子破之其年詣達就撫塞上無事萬厯初閱視侍郎吳百朋發芳行賄事勒閒住已起僉書前軍都督府順義王要賞聲言渝盟復用芳鎮宣府七年以疾乞歸又二年卒芳起行伍十餘年為大帥戰膳房堡朔州登鷹巢鴿子堂龍門萬全右衛東嶺孤山土木乾莊全道張家堡得勝堡大沙灘大小百十接身被數十創以少擊衆未嘗不大捷禽部長數十人斬

馘無算威名震邊陲為一時將帥冠石州城陷副將田  
世威參將劉寶論死芳乞寢已廕子贖二將罪為御史  
所劾勅戒諭後世威復為將遇芳薄芳不與校識者多  
之二子棟林棟官至都督無所見林由父廕累官大同  
參將萬厯二十年順義王徹哩克繫獻史車二部長林  
以制敵功進副總兵二十七年擢署都督僉事為遼東  
總兵官林雅好文學能詩工書交遊多名士時譽籍甚  
自許亦甚高嘗陳邊務十策語多觸文吏寢不行稅使

高淮橫恣林力與抗淮劾奏之坐奪職給事中侯先春  
論救改林戍烟瘴先春亦左遷二官久之遇赦免遼左  
用兵詔林以故官從征楊鎬之四路出師也令林將一  
軍由開原出三岔口而以遊擊竇永澄監北關軍竝進  
林軍至尚間崖結營浚壕嚴斥堠自衛及聞杜松軍敗  
方移營而

大清兵已逼乃還兵別立營浚壕三周列火器壕外更  
布騎兵於火器外他士卒皆下馬結方陣壕內又一軍



西營飛芬山杜松軍既覆

大清兵乘銳薄林軍見林壕內軍已與壕外合而陳縱精騎直前衝之林軍不能支遂大敗副將麻巖戰死林僅以數騎免死者彌山谷血流淌間崖下水為之赤

大清遂移兵擊飛芬山僉事潘宗顏等一軍亦覆北關兵聞之遂不敢進林既喪師謫充為事官俾守開原時蒙古宰桑諾木圖許助林兵林與結約恃此不設備其年六月

大清兵忽臨城林列衆城外分少兵登陴

大清兵設楯梯進攻而別以精騎擊破林軍之營東門外者軍士爭門入遂乘勢奪門攻城兵亦踰城入林城外軍望見盡奔

大清兵據城邀擊壕不得渡悉殲之林及副將于化龍參將高貞遊擊于守志守備何懋官等皆死焉尋贈都督同知進世廕二秩林雖更歷邊鎮然未經強敵無大將才當事以虛名用之故敗林五子燃熠炯煥颺燃熠

戰死尚間崖炯天啟中湖廣總兵官協討貴州叛賊從  
王三善至大方數戰皆捷已大敗三善自殺炯潰歸得  
疾而卒煥幼習兵畧天啟中為遼東遊擊督師閣部孫  
承宗以其父死王事獎用之命代王楹守中右所及巡  
撫袁崇煥更營制以故官掌前鋒左營數有功屢遷至  
副總兵守徐州崇禎八年正月賊陷鳳陽大掠而去煥  
及守備駱舉率兵入以恢復告遂留戍其地八月賊擾  
河南總督朱大典命移駐潁亳事定還徐州十年賊犯

桐城燬赴救破之羅唱河尋以護陵功增秩一級歸德  
徐州間有地曰朱家廠土寇據之時出掠燬勦滅之賊  
犯固始大典檄燬及遊擊張士儀等分戍霍邱西南扼  
賊東下賊遂走六安大典又移燬等駐壽州東兼護二  
陵當是時長淮南北專以陵寢為重燬馳驅數年幸無  
失事十二年六月擢總兵官鎮守天津久之移鎮甘肅  
十五年督三協副將王世寵王加春魯蔭昌等討破叛  
番斬首七百餘級撫安三十八族而還其冬督師孫傳

庭檄召不至疏劾之帝令察曠堪辦賊許戴罪圖功否  
即以賜劍從事及曠至軍傳庭貸其罪已復以逗遛淫  
掠被劾帝仍令戴罪自効明年秋傳庭將出關有傳賊  
自內鄉窺商雒者檄曠移商州扼其北犯已而傳庭師  
覆曠遂還鎮未幾賊陷延綏寧夏遂陷蘭州渡河抵甘  
州環攻之曠與巡撫林曰瑞竭力固守賊乘雪夜坎而  
登士卒寒甚不能戰城遂陷曠日瑞及中軍哈維新姚  
世儒皆死焉弟鼐為沔陽州同知城陷亦死之曠父子

兄弟皆死國難

何卿成都衛人。有志操。習武事。正德中。嗣世職。為指揮。僉事。以能擢筠連守備。從巡撫盛應期。擊斬叛賊謝文。禮文。義。世宗立。論功。進署都指揮。僉事。充左參將。協守松潘。嘉靖初。芒部土舍隴政。土婦支祿等叛。卿討之。斬首二百餘級。降其衆數百人。政奔烏撒。卿檄土官安寧。禽以獻。寧佯諾。而匿政不出。巡撫湯沐言狀。帝奪卿冠帶。川貴兵合討賊。始滅。還冠帶如初。五年春。擢卿副總。

兵仍鎮松潘隴氏已絕改芒部為鎮雄府設流官未幾  
政遺黨沙保復叛卿偕參將魏武參議姚汝臯等並進  
斬保等賊首七人餘盡殄錄功武最卿次之賜賚有差  
黑虎五砦番反圍長安諸堡烏都鵠諸番亦繼叛卿  
皆破平之就進都督僉事威茂番十餘砦連兵劫軍饌  
且攻茂州及長寧諸堡要撫賞卿與副使朱統築茂州  
外城以困之旋以計殘其衆戰屢捷遂攻深溝焚其碉  
砦諸番窘請贖罪卿責獻首惡番不應復分勦淺溝渾

水二砦殲之諸番乃爭獻首惡挿血斷指耳誓不復叛  
卿乃與刻木為約分處其曹畫疆守松潘路復通巡撫  
潘鑑等上二人功詔賚銀幣進署都督同知鎮守如故  
久之以疾致仕二十三年塞上多警召卿以疾辭帝怒  
奪其都督命以都指揮使詣部聽調未幾寇逼畿輔命  
營盧溝橋松潘副總兵李爵為巡撫邱養浩劾罷詔以  
卿代給事中許天倫言卿賄養浩劾爵自為地帝怒褫  
卿及養浩官令巡按冉崇禮覈實時兵事棘翁萬達復



薦卿還其都督僉事督東官廳軍馬已而崇禮具言爵貪污卿鎮松潘十七年為蜀保障軍民頌德且貧安所得賄帝意乃解四川白草番為亂副總兵高岡鳳被劾兵部尚書路迎奏卿代之卿再蒞松潘將士咸喜乃會巡撫張時徹討禽渠惡數人俘斬九百七十有奇克營砦四十七毀碉房四千八百獲馬牛器械儲積各萬計進署都督同知卿素有威望為番人所憚自威茂迄松潘龍安夾道築牆數百里行旌往來無剽斂患先後蒞

鎮二十四年軍民戴之若慈母再以疾歸三十三年倭寇海上詔卿與沈希儀各率家衆赴蘇松軍門明年充副總兵總理浙江及蘇松海防卿蜀中名將不諳海道年已老兵與將不習竟不能有所為為巡撫御史周如斗劾罷卒

沈希儀字唐佐貴縣人嗣世職為奉議衛指揮使機警有膽勇智計過絕於人正德十二年調征永安以數百人擣陳村砦馬陷淖中騰而上連馘三箇破其餘衆進

署都指揮僉事義寧賊寇臨桂還巢希儀追之巢有兩  
隘賊伏兵其一使熟徭紹官兵入希儀策其詐急從別  
隘直抵賊巢賊倉卒還救遂大破之荔浦賊八千渡江  
東掠希儀率五百人駐白面砦待其歸砦去蛟龍滑石  
兩灘各數里希儀以滑石灘狹雖衆可薄蛟龍灘廣濟  
則難圖欲誘致之滑石乃樹旗百蛟龍灘守以羸卒然  
柴以疑之賊果趨滑石希儀預以小艦載勁卒伏葦  
中賊渡且半乘瀧急衝之兩岸軍譟而前賊衆多墜水

死收所掠而還從副總兵張祐連破臨桂灌陽古田賊  
進署都指揮同知掌都司事嘉靖五年總督姚鏌將討  
田州岑猛用希儀計間猛婦翁歸順土酋岑璋使圖猛  
而分兵五哨進希儀將中哨當工堯工堯賊要地聚衆  
守之希儀夜遣軍三百人緣山上繞出其背比明合戰  
則所遣軍已立幟山巔賊大潰敗猛走歸順為璋所執  
田州平希儀功最鏌抑之止受賚鏌議設流官希儀曰  
思恩以流官故亂至今未已田州復然兩賊且合從起

鎮不從以希儀為右參將分守思田希儀請還鄉治裝以參將張經代守甫一月田州復叛鎮罷歸王守仁代多用希儀計思田復定改右江柳慶參將駐柳州象州武宣融縣徭反討破之謝病歸頃之還故任柳在萬山中城外五里即賊巢軍民至無地可田而官軍素罷不任戰又賊耳目徧官府閭閻動靜無不知希儀謂欲大破賊非狼兵不可請於制府調那地狼兵二千來戍兵稍振乃求得與徭通販易者數十人持其罪而厚撫之

使詞賊賊動靜希儀亦無不知希儀每出兵雖肘腋親近不得聞至期鳴號則諸軍咸集令一人挾旗引諸軍行不測所往及駐軍設伏賊必至遇伏輒奔官軍擊之無不如志已賊寇他所官軍又先至遠村僻聚賊度官軍所不逮者往寇之官軍又未嘗不在賊驚以為神希儀得賊巢婦女畜產果鄰巢者悉還之惟取陰助賊者諸徭盡讐伏無敢嚮賊希儀初至令熟徭得出入城中無所禁因厚賞其黠者使為謀後漸令徭婦入見其妻

賚以酒食繒帛其夫常以賊情告者則陰厚之諸猺婦  
利賞爭勸其夫輸賊情或自入府言之以故賊益無所  
匿形希儀每於風雨晦冥夜偵賊所止宿分遣人齎銃  
潛伏舍旁中夜銃舉賊大駭曰老沈來矣咸挈妻子匍  
匐上山兒啼女號或寒凍觸厓石死爭怨悔作賊非計  
至曉下山則寂無人聲他巢亦然衆愈益驚潛遣人入  
城偵之則希儀故居城中不出也賊膽落多易面為熟  
猺韋扶諫者馬平猺魁也累捕不得有報扶諫逃鄰賊

二層巢者希儀潛率兵勦之則又與三層賊往劫他所  
希儀盡俘三層巢妻子歸希儀俘賊妻子盡以畀狼兵  
至是獨閉之空舍飲食之使熟徭往語其夫曰得韋扶  
諫還矣諸徭聞悉來謁希儀令入室視之妻子固無恙  
乃共誘扶諫出巢縛以獻易妻子還希儀剗扶諫目支  
解之懸諸城門諸徭服希儀威信益不敢為盜自是柳  
城四旁數百里無敢攘攷者希儀嘗上書於朝言狼兵  
亦徭獠耳徭獠所在為賊而狼兵死不敢為非非狼兵



順而徭獍逆也狼兵隸土官徭獍隸流官土官令嚴足以制狼兵流官勢輕不能制徭獍若割徭獍分隸之旁近土官土官世世富貴不敢有他望以國家之力制土官以土官之力制徭獍皆為狼兵兩廣世世無患矣時不能用至十六年而有思恩岑金之變初思恩土官岑濬既誅改設流官以其酋二人韋貴徐五為土巡檢分掌其兵各萬餘夷民不樂漢法凡數叛鎮安有男子名金自言濬子鎮安土官乃潛召其舊部酋長出金而與

之盟曰若小主也諸酋羅拜擁金歸聚兵五千將攻城復故地遠近洶洶濬誅時其酋楊留者無所歸率黨千餘人詣賓州應募為打手希儀在賓留入言欲往見小主人希儀故惠金及聞留言益大駭因好謂留曰是岑濬第九子也我向征田州固聞之因自語岑氏其復乎欲以深動留留果喜已召留密室言予我重賂即為金復官且出復呼入曰韋貴徐五今分將思恩兵必讐金善防之留益大信金遂從五千人因留以見門者奔告

請無納希儀罵曰金土官子非賊奈何不納引入厚納之又引以詣兵備副使隨以計漸散其五千人卒縛金留亦自恨死思恩復寧已從總督張經大破斷藤峽弩灘賊受賚歸希儀鎮柳慶久渠魁宿猾捕誅殆盡先後擣巢斬馘積五千餘級未嘗悉奏功故多不叙十九年復謝病柳人祀之山雲祠旋起四川左參將分守敘瀘及貴州迤西諸處其冬擢署都督僉事充總兵官鎮貴州復謝病歸塞上多警召天下名將至京師希儀在召

中希儀鎮柳慶每戰必先登身數被創陰雨輒痛劇故  
數謝病至京亦以病辭帝疑其規避褫都督官令赴部  
候用翁萬達薦其才會江淮多盜議設督捕總兵官乃  
復希儀署都督僉事以往二十六年以為廣東副總兵  
命自今將領至自川廣雲貴者毋推京營及西北邊著  
為令從總督張岳大破賀縣賊倪仲亮等予實授仍賚  
銀幣瓊州五指山熟黎素畏法供徭賦知州邵濬虐取  
之其酋那燕遂結崖州感恩昌化諸黎為亂總督歐陽

必進議并萬州陵水黎討之分兵五道希儀適病最後  
至謂必進曰萬州陵水黎未有黨惡之實奈何并誅益  
樹敵莫若止三道必進從之希儀乃偕參將武鸞俞大  
猷等直入五指山下斬那燕及其黨五千四百有奇俘  
獲者五之一招降三千七百人捷聞進都督同知改貴  
州總兵官復從岳平銅仁叛苗龍許保吳黑苗又以病  
歸倭寇海上命督川廣兵赴勦無功為周如斗劾罷希  
儀為人坦率居恒謔笑洞見肺腑及臨敵應變出奇人

莫測尤善撫士卒常染危病卒多自戕以禱於神最後一人至以箭穿其喉其得士心如此

石邦憲字希尹貴州清平衛人嘉靖七年嗣世職為指揮使累功進署都指揮僉事充銅仁參將苗龍許保吳黑苗叛總督張岳議征之而賊陷印江石阡邦憲坐逮問岳以銅仁賊巢穴而邦憲有謀勇乃奏留之邦憲遂與川湖兵進貴州破苗砦十有五竄山箐者搜戮殆盡上功邦憲第一未及敘而許保等突入思州執知府李

允簡以去邦憲急邀奪之歸坐是停俸戴罪賊既破思  
州復糾餘黨與湖廣蜡爾山苗合欲攻石阡不克因過  
省溪千戶安大朝等邀之斬獲大半盡奪其輜重賊不  
能軍邦憲乃使使購老獠老猺等執許保送軍門而黑  
苗竄如故復以計購烏朗土官田興邦等斬黑苗賊盡  
平遂進署都督僉事充總兵官代沈希儀鎮貴州臺黎  
砦苗關保倡亂四川容山廣西洪江諸苗應之遠近騷  
然撫勦莫能定邦憲與湖廣兵分道討破之傳檄十八

砦許執首惡贖罪諸苗聽撫設盟受約而還播州宣慰  
楊烈殺長官王黼黼黨李保等治兵相攻且十年總督  
馮岳與邦憲討平之播州苗盧阿項為亂邦憲以兵七  
千編筏渡江直抵磨子崖策賊必夜襲先設備賊至擊  
敗之賊求援於播州吳鯤諸將懼邦憲曰水西宣慰安  
萬銓播州所畏也吾調水西兵攻烏江聲揚烈縱鯤助  
逆罪烈奚暇救人乎已水西兵至邦憲進逼其巢乘風  
縱火斬關而登賊大奔潰禽賊首父子斬獲四百七十



餘人進署都督同知破地隆阡叛苗四砦又破答干諸  
砦禽其渠魁地隆阡遺賊龍老三龍得奎結龍停苗老  
天扳斃苗石章保等縱兵掠執石耶洞土官妻冉氏以  
歸攻梅平砦官軍要禽老三得奎走免復與老天等攻  
破平南營囤邦憲傾冉氏在老天所陽議贖而潛擊殺  
老天官軍遂入龍停砦并執扳斃砦苗龍老丙令執獻  
章保於是諸苗悉降白洗養鵝諸苗叛討禽其魁降百  
餘砦湖廣淑浦猺沈亞當等為亂總督石勇檄邦憲討

之生禽亞當斬獲二百有奇澈浦南平銅仁都勻苗相煽叛邦憲亟馳還率守備安大朝進勦先破彪山砦賊乘勝畧定諸砦獲賊首龍老羅王三等餘黨盡平又與總督黃光昇修湖北整臺烽堠百十所招降冷水溪諸洞苗二十八砦播州容山副長官土舍韓甸與正長官土舍張問相攻甸屢勝遂糾生苗剽湖貴境垂二十年問亦糾黨自助邦憲討之斬百餘人問潛出被獲官軍乘勝入甸巢會暮大雨迷失道守備葉勛百戶魏國相

等陷伏中死焉邦憲奪圍出還軍鎮遠再征之賊沿江  
守邦憲佯與爭而別自上流三十里編竹以渡水陸並  
進大破之斬甸容山平進右都督尋與巡撫吳維嶽招  
降平州叛酋楊珂勦平龍里衛賊阿利等當是時水西  
宣慰安國亨恃衆跋扈謁上官辭色不善輒鼓衆譟譟  
而出邦憲召責之曰爾欲反耶吾視爾釜中魚爾爾兵  
孰與雲貴川湖多爾四十八酋長吾鑄四十八印畀之  
朝下令夕滅爾矣國亨叩頭謝為斂戢隆慶元年勦平

鎮遠苗已又破誅白泥土官楊貳及苗酋龍力水等部  
內帖然邦憲生長黔土熟苗情善用兵大小數十百戰  
無不摧破前後進秩者四賚銀幣十有三所得俸賜悉  
以饗士家無贏資為總兵官十七年威鎮蠻中與四川  
何卿廣西沈希儀並稱一時名將明年卒官贈左都督  
贊曰嗚呼明至中葉曷嘗無邊材哉如馬永梁震周尚  
文沈希儀之徒出奇制勝得士卒死力雖古名將何以  
加焉然功高賞薄起蹶靡常此無異故其抗懷奮激無

以結歡在朝柄政重人宜其齟齬不相入也馬芳三代  
為將父子兄弟先後殉國偉矣哉

明史卷二百十一

欽定四庫全書

明史卷二百十一考證

馬永傳永代劉淮為總兵

臣宋銑按鄭曉名臣記嘉

靖十四年遼東軍亂逐都御史呂經乃召永總兵遼

東識大錄亦載逐呂經事傳未及呂經字道夫陝西

寧州人謹附考

馬永傳永為將雅知人所拔卒校後多至大師

臣宋

銑按永所拔諸人其起列校至方鎮者為蕭陞劉淵

祝雄見鄭曉名臣記謹附考

梁震傳震有機畧號令明審前後百十戰未嘗少挫

臣宋銑按鄭曉所撰傳云震在邊專練家丁劫敵營

得馬盡與諸出塞者以故人皆趨利效死敵益畏謹

附考

周尚文傳獲首功以為都督同知臣宋銑按識大錄

嘉靖庚子沙城之捷賜蟒衣玉帶辛丑召入提督團

營傳未及謹記



周尚文傳叛人充灼召小王子寇邊尚文偵得其使者

臣宋銑按明實錄充灼為代簡王桂之後先以奉

國將軍坐罪奪俸乃與應州人羅廷璽等畫策勾小王子入塞攻取雁門平陽遣人陰持火箭焚大同草場五六所而令通蒙古語者衛奉關出塞為尚文邏卒所獲傳所云偵得其使者蓋指此謹附考

馬芳傳錫林阿巴圖爾入躡遵化玉田芳追戰金山寺

有功

臣

宋銑按明實錄嘉靖三十八年二月巴圖

爾侵灤河大掠遵化遷安薊州玉田駐內地五日京師大震御史王漸方輅交章劾王忬逮下詔獄忬以下亦獲罪貶官芳之貶蓋在是時謹附考

馬芳傳其年諳達就撫萬厯初吳百朋發芳行賄事

臣宋銑按語達就撫在隆慶五年芳之被劾在萬厯

初吳百朋傳稱萬厯初奉命閱視宣大山西可証傳稱元年紀叙未明晰擬改作萬厯初年并刪七行遂字以符勻刻

沈希儀傳嗣世職為奉議衛指揮使

臣

宋銑按唐順

之沈希儀碑記希儀正德三年襲指揮使五年掌

衛印八年勦木頭十二年征永安十四年征府江十

五年征古田所至常先大軍首登奪隘為多謹附考

石邦憲傳貴州清平人

臣

宋銑按張鼎文所撰石

邦憲墓志邦憲其先山東壽光人洪武四年歸附由

遼東衛百戶世襲都指揮僉事邦憲於嘉靖初嗣職

謹附考

石邦憲傳隆慶二年卒於官

臣宋銑按邦憲於隆慶

戊辰卒於銅仁官舍卒之日呼二子命以俸米餉軍士端坐而瞑士民為捐貲立祠載獻徵錄謹附考

明史卷二百十一考證

附明史卷二百十一考證後

乾隆四十一年

賜諡諸臣

馬林 馬燠

以上通諡忠烈

賜祀忠義祠

馬燃 馬熠



欽定四庫全書

明史卷二百十二

大學士張廷玉等奉 敕修

列傳

俞大猷

盧鏜  
湯克寬

戚繼光

弟繼美  
朱先

劉顯

郭成

李錫

黃應甲  
尹鳳

張元勳

俞大猷字志輔晉江人少好讀書受易於王宣林福得

蔡清之傳又聞趙本學以易推行兵家寄正虛實之權  
復從受其業嘗謂兵法之數起五猶一人之身有五體  
雖將百萬可使合為一人也已又從李良欽學劍家貧  
屢空意嘗豁如父歿棄諸生嗣世職百戶舉嘉靖十四  
年武會試除千戶守禦金門軍民囂訟難治大猷導以  
禮讓訟為衰止海寇頻發上書監司論其事監司怒曰  
小校安得上書杖之奪其職尚書毛伯溫征安南復上  
書陳方畧請從軍伯溫奇之會兵罷不果用二十一年



諳達大入山西詔天下舉武勇士大猷詣巡按御史自薦御史上其名兵部會伯溫為尚書送之宣大總督翟鵬所召見論兵事大猷屢折鵬鵬謝曰吾不當以武人待子下堂禮之驚一軍然亦不能用大猷辭歸伯溫用為汀漳守備涖武平作讀易軒與諸生為文會而日教武士擊劍連破海賊康老俘斬三百餘人擢署都指揮僉事僉書廣東都司新興恩平峒賊譚元清等屢叛總督歐陽必進以屬大猷乃令良民自為守而親率數人

徧詣賊峒曉以禍福且教之擊劍賊駭服有蘇青蛇者  
力格猛虎大猷給斬之賊益驚乃詣何老猫峒令歸民  
侵田而招降渠魁數輩二邑以寧二十八年朱統巡視  
福建薦為備倭都指揮會安南入寇必進奏留之先是  
安南都統使莫福海卒子宏渙幼其大臣阮敬謀立其  
壻莫敬典范子儀謀立其黨莫正中互讐殺正中敗挈  
百餘人來歸子儀收殘卒遁海東至是妄言宏渙死迎  
正宗歸立剽剝欽廉等州嶺海騷動必進檄大猷討之

馳至廉州賊攻城方急大猷以舟師未集遣數騎諭降  
且聲言大兵至賊不測果解去無何舟師至設伏寇頭  
嶺賊犯欽州大猷遮奪其舟追戰數日生擒子儀弟子  
流斬首千二百級窮追至海東雲屯檄法溪殺子儀函  
首來獻事平嚴嵩抑其功不叙但賚銀五十兩而已是  
年瓊州五指山黎那燕構感恩昌化諸黎共反必進復  
檄大猷討而朝議設叅將於崖州即以大猷任之乃會  
廣西副將沈希儀諸軍擒斬賊五千三百有奇招降者

三千七百大猷言於必進曰黎亦人也率數年一反一  
征豈上天生人意宜建城設市用漢法雜治之必進納  
其言大猷乃單騎入峒與黎定要約海南遂安三十一  
年倭賊大擾浙東詔移大猷寧台諸郡參將會賊破寧  
波昌國衛大猷擊却之復攻臨紹興臨山衛轉掠至松  
陽知縣羅拱宸力禦賊而大猷邀諸海斬獲多竟坐失  
事停俸未幾逐賊海中焚其船五十餘予俸如故越二  
年賊據寧波普陀大猷率將士攻之半登賊突出殺武

舉火斌等三百人坐戴罪辦賊俄敗賊吳淞所詔除前  
罪仍資銀幣賊自健跳所入掠大猷連戰破之旋代湯  
克寬為蘇松副總兵所將卒不三百人徵諸道兵未集  
賊犯金山大猷戰失利時倭屯松江柘林者盈二萬總  
督張經趣之戰大猷固不可及永順保靖兵稍至乃從  
經大破賊於王江涇功為趙文華胡宗憲所攘不叙坐  
金山失律謫充為事官柘林倭雖敗而新倭三十餘艘  
突青村所與南沙小烏口浪港諸賊合犯蘇州陸涇壩

直抵婁門敗南京都督周于德兵賊復分為二北掠潞  
墅南掠橫塘延蔓常熟江陰無錫之境出入太湖大猷  
偕副使任環大敗賊陸涇壩焚舟三十餘又遮擊其自  
三丈浦出海者沉七艘賊乃退泊三板沙頃之他倭犯  
吳江大猷及環又邀破之鶯脰湖賊走嘉興三板沙賊  
掠民舟將遁大猷追擊於馬蹟山禽其魁金涇許浦白  
茅港賊俱出海大猷追擊於茶山焚五舟賊走保馬蹟  
山三板沙將士復追及壞其三舟江陰蔡港倭亦去官

兵分擊於馬蹟馬圖寶山值颶風作賊舟多覆柘林倭亦為官兵所擊沉二十餘舟餘賊退登陸已復泛舟出海大猷及僉事董邦政分擊獲九舟而賊又遭風壞三舟餘三百人登岸走據華亭陶宅鎮屢敗趙文華等大猷夜屯周浦永定寺官兵四集進圍之而柘林失風賊九舟巢於川沙窪糾合至四十餘艘勢猶未已巡撫曹邦輔劾大猷縱賊帝怒奪其世廕責取死罪招立功自贖時周浦賊圍急乘夜東北奔為遊擊曹克新所邀斬

首百三十遂與川沙窪賊合諸軍日夜擊賊焚巢出海  
大猷偕副使王崇古入洋追之及於老鸛嘴焚巨艦入  
斬獲無算餘賊奔上海浦東初以倭患急特命都督劉  
逵為浙江總兵官兼轄蘇松諸郡數月無所為廷臣爭  
言大猷才三十五年三月遂罷逵以大猷代賊犯西庵  
沈莊及清水窪大猷偕邦政擊敗之賊走陶山詔還世  
廕賊自黃浦遁出海大猷追敗之其年冬以與平徐海  
功加都督僉事海既平浙西倭悉靖獨寧波舟山倭負



險官兵環守不能克是時士兵狼兵悉已遣歸而川貴  
所調麻寮大刺鎮溪桑植兵六千始至大猷乘大雪四  
面攻之賊死戰殺土官一人諸軍益競進焚其柵賊多  
死其逸出者復殪賊盡平加大猷署都督同知明年胡  
宗憲方圖汪直用盧鏜言將與通市大猷力爭不可及  
直誘入下吏其黨毛海峯等遂據舟山阻岑港自守大  
猷環攻之時小勝然苦仰攻將士先登多死新倭又大  
至朝廷趣宗憲甚急宗憲謾為大言以對廷臣競詆宗

憲并劾大猷乃奪大猷及參將戚繼光職期一月內平賊大猷等懼攻益力賊益死守三十七年七月乃自岑港移柯梅造舟成泛海去大猷等橫擊之沈其一舟餘賊遂揚帆而南流劫閩廣大猷先後殺倭四五千賊幾平而官軍圍城已一年宗憲亦利其去陰縱之不督諸將邀擊比為御史李瑚所劾則委罪大猷縱賊以自解帝怒逮繫詔獄再奪世廕陸炳與大猷善密以已資投嚴世蕃解其獄令立功塞上大同巡撫李文進習其才

與籌軍事乃造獨輪車拒敵馬嘗以車百輛步騎三千  
大挫敵安銀堡文進上其制於朝遂置兵車營京營有  
兵車自此始也文進將襲拜姓謀之大猷果大獲詔還  
世廕寇掠廣武大猷拒劫之先論平汪直功許除罪錄  
用及是鎮算有警言川湖總督黃光昇薦大猷即用為鎮  
算叅將廣東饒平賊張璉數攻陷城邑積年不能平四  
十年七月詔移大猷南贛合閩廣兵討之時宗憲兼制  
江西知璉遠出檄大猷急擊大猷謂宜以潛師搗其巢

攻其必救奈何以數萬衆從一夫浪走哉乃疾引萬五  
千人登柏嵩巔俯瞰賊巢璉果還救大猷連破之斬首  
千二百餘級賊懼不出用間誘連出戰從陣後執之并  
執賊魁蕭雪峯廣人攘其功大猷不與較散餘黨二萬  
不戮一人擢副總兵協守南贛汀漳惠潮諸郡遂乘勝  
征程鄉盜走梁寧禽徐東洲林朝曦者獨約黃積山大  
舉官軍攻斬積山朝曦過後亦為徐甫宰所滅大猷尋  
擢福建總兵官四十二年與戚繼光復興化城共破海

倭詳繼光傳繼光先登受上賞大猷但資銀幣是冬徙鎮南贛明年改廣東潮州倭二萬與大盜吳平相犄角而諸峒藍松三伍端溫七葉丹樓輩日掠惠潮間閩則程紹祿亂延平梁道輝擾汀州大猷以威名懾羣盜單騎入紹祿營督使歸峒因令驅道輝歸兩人卒為他將所滅惠州叅將謝敕與伍端溫七戰失利以俞家軍至恐之端乃驅諸酋以歸無何大猷果至七被禽端自縛乞殺倭自効大猷使先驅官軍繼之圍倭鄒塘一日夜

克三巢焚斬四百有奇又大破之海豐倭悉奔崎沙甲  
子諸澳奪漁舟入海舟多沒於風脫者二十餘人還保  
海豐金錫都大猷圍之兩月賊食盡欲走副將湯克寬  
設伏邀之手斬其梟將三人參將王詔等繼至賊遂大  
潰乃移師潮州以次降藍松三葉丹樓逐使招降吳平  
居之梅嶺平未幾復叛造戰艦數百聚衆萬餘築三城  
守之行劫濱海諸郡縣福建總兵官戚繼光襲平平遁  
保南澳四十四年秋入犯福建把總朱璣等戰沒於海

中大猷將水兵繼光將陸兵夾擊平南澳大破之平僅  
以身免奔據撓平鳳凰山繼光留南澳大猷部將湯克  
寬李超等躡賊後連戰不利平遂掠民舟出海閩廣巡  
按御史交章論之大猷坐奪職平卒為克寬所追擊遠  
遁以免不敢入犯矣何源翁源賊李亞元等猖獗總督  
吳桂芳留大猷討之徵兵十萬分五哨進大猷使間搗  
賊黨而親搗其巢生禽亞元俘斬一萬四百奪還男婦  
八萬餘人乃還大猷職以為廣西總兵官故事以勲臣

總兩廣兵與總督同鎮梧州帝用給事中歐陽一敬議  
兩廣各置大帥罷勲臣乃召恭順侯吳繼爵還京以大  
猷代予平蠻將軍印而以劉顯鎮廣東兩廣並置帥自  
大猷及顯始也伍端死其黨王世橋復叛劫執同知郭  
文通大猷連敗之其部下執以獻進署都督同知海賊  
曾一本者吳平黨也既降復叛執澄海知縣敗官軍守  
備李茂才中毆死詔大猷暫督廣東兵協討隆慶二年  
一本犯廣州尋犯福建大猷合郭成李錫軍擒滅之錄



功進右都督廣西古田獐黃朝猛韋銀豹等嘉靖末嘗  
再劫會城庫殺叅將黎民表巡撫殷正茂徵兵十四萬  
屬大猷討之分七道進連破數十巢賊保潮水巢極巔  
攻十餘日未下大猷佯分兵擊馬浪賊而密令叅將王  
世科乘雨夜登山設伏黎明礮發賊大驚諸軍攀援上  
賊盡死馬浪諸巢相繼下斬獲八千四百有奇禽朝猛  
銀豹百年積寇盡除進世廕為指揮僉事大猷為將廉  
馭下有恩數建大功威名震南服而巡按李良臣劾其

奸貪兵部力持之詔還籍侯調起南京右府僉書未任以都督僉事為福建總兵官萬厯元年秋海寇突閩峽澳坐失利奪職復以署都督僉事起後府僉書領車營訓練三疏乞歸卒贈左都督諡武襄大猷負奇節以古賢豪自期其用兵先計後戰不貪近功忠誠許國老而彌篤所在有大勲武平崖州饒平皆為祠祀譚綸嘗與書曰節制精明公不如綸信賞必罰公不如戚精悍馳騁公不如劉然此皆小知而公則堪大受戚謂戚繼光

劉謂劉顯也子咨舉福建總兵官盧鏜汝寧衛人嘉靖時由世廕歷福建都指揮僉事為都御史朱統所任統自殺鏜亦論死尋赦免以故官備倭福建遷都指揮擊賊嘉興敗責戴罪尋擢參將分守浙東濱海諸郡與副將大猷大破賊王江涇旋督保靖土兵及蜀將陳正元兵擊賊張莊焚其壘追擊之後港為賊所敗賊出沒台州外海都指揮王沛敗之大陳山賊登山官軍焚其舟鏜會巢禽其酋林碧川等餘倭盡滅別賊掠諸縣指揮

閔溶等敗死鏜奪職戴罪旋以薦擢協守江浙副總兵  
賊陷仙居趨台州鏜破之彭溪乃與胡宗憲共謀滅徐  
海宗憲招汪直鏜亦說日本使善妙令禽直直與日本  
貳卒伏誅倭犯江北鏜馳援破之又敗北倂倭二十餘  
艘賊斂舟三沙復流効江北巡撫李遂効鏜縱賊鏜已  
擢都督僉事為江南浙江總兵官奪職視事以通政唐  
順之薦復職如初尋以誅汪直功進都督同知倭復犯  
浙東水陸十餘戰斬首千四百有奇總督宗憲以蕩平

聞鏜復增俸資金鏜擢用由宗憲宗憲敗給事中邱樞  
劾鏜八罪逮治免歸鏜有將畧倭難初興諸將悉望風  
潰敗獨鏜與湯克寬敢戰名亞俞戚云克寬邳州衛人  
父慶嘉靖中江防總兵官克寬承世廕歷官都指揮僉  
事充浙江參將倭犯溫州克寬擊敗之別賊寇嘉興屬  
邑克寬至海鹽被圍偕叅政潘恩等拒守賊不能克乃  
焚掠而去無何陷乍浦城轉掠奉化寧海克寬追圍於  
獨山民家火焚之賊半死餘奪圍遁時濱海多被倭患

而將士無紀律賊至輒奔議設大將統制江淮乃命克寬為副總兵駐金山衛提督海防諸軍倭三百人泊崇明南沙克寬偕僉事任環攻之敗績賊移舟寶山克寬追敗之南家背賊乃轉寇嘉定上海間被劾奪官從軍倭二千餘分掠蘇松克寬逆戰採淘港斬首八百餘級都御史王忬薦為浙西參將遇賊嘉湖復失利詔以白衣辦賊總督張經議搗賊柘林令克寬將廣西土兵屯乍浦與副將大猷等相犄角大戰王江涇斬級二千會

趙文華劾經惑克寬言縱倭飽颺遂併逮問論死久之  
赦免廣東用兵命赴軍前自劾從大猷大破倭海豐還  
世廕俄以為惠潮叅將復從大猷破吳平平未幾復振  
克寬已擢狼山副總兵命留討賊俄敗之陽江烏豬洋  
平寔奔安南都御史吳桂芳檄安南協討遣克寬以舟  
師會夾擊平萬橋山下焚其舟禽斬四百人平遠竄乃  
進克寬署都督僉事為廣東總兵官曾一本突海豐惠  
來間克寬倡議撫之令居潮陽下澮地未幾激民變一

金史卷一百一十二  
本亦反詔逮克寬訊治尋赦免赴薊鎮立功萬歷四年  
綽哈入掠古北口克寬偕參將苑宗儒追出塞遇伏戰  
死

戚繼光字元敬世登州衛指揮僉事父景通歷官都指  
揮署大寧都司入為神機坐營有操行繼光幼倜儻負  
奇氣家貧好讀書通經史大義嘉靖中嗣職用薦擢署  
都指揮僉事備倭山東改僉浙江都司充叅將分部寧  
紹台三郡三十六年倭犯樂清瑞安臨海繼光援不及



以道阻不罪尋會俞大猷兵圍汪直餘黨於岑港久不克坐免官戴罪辦賊已而倭遁他倭復焚掠台州給事中羅嘉賓等劾繼光無功且通番方按問旋以平汪直功復官改守台金嚴三郡繼光至浙時見衛所軍不習戰而金華義烏俗稱慄悍請召募三千人教以擊刺法長短兵迭用由是繼光一軍特精又以南方多藪澤不利馳逐乃因地形制陣法審步伐便利一切戰艦火器兵械精求而更置之戚家軍名聞天下四十年倭大掠

桃渚圻頭繼光急趨寧海扼桃渚敗之龍山追至鴈門  
嶺賊遁去乘虛襲台州繼光手殲其魁虺餘賊瓜陵江  
盡死而圻頭倭復趨台州繼光邀擊之仙居道無脫者  
先後九戰皆捷俘馘一千有奇焚溺死者無算總兵官  
盧鏜參將牛天錫又破賊寧波温州浙東平繼光進秩  
三等閩廣賊流入江西總督胡宗憲檄繼光援擊破之  
上坊巢賊奔建寧繼光還浙江明年倭大舉犯福建自  
溫州來者合福寧連江諸倭攻臨壽寧政和寧德自廣

東南澳來者合福清長樂諸倭攻陷元鍾所延及龍巖  
松溪大田古田莆田是時寧德已屢陷距城十里有橫  
嶼四面皆水路險隘賊結大營其中官軍不敢擊相守  
踰年其新至者營牛田而酋長營興化東南互為聲援  
閩中連告急宗憲復檄繼光勦之先擊橫嶼賊人持草  
一束填壕進大破其巢斬首二千六百乘勝至福清搗  
敗牛田賊覆其巢餘賊走興化急追之夜四鼓抵賊柵  
連克六十營斬首千數百級平明入城興化人始知牛

酒勞不絕繼光乃旋師抵福清遇倭自東營渙登陸擊斬二百人而劉顯亦屢破賊閩宿寇幾盡於是繼光至福州飲至勒石平遠臺及繼光還浙後新倭至者日益衆圍興化城匝月會顯遣卒八人齎書城中衣刺天兵二字賊殺而衣其衣紹守將得入夜斬關延賊副使翁時器叅將軍高走免通判吳世亮攝府事遇害焚掠一空留兩月破平海衛據之初興化告急時帝已命俞大猷為福建總兵官繼光副之及城陷劉顯軍少壁城下

不敢擊大猷亦不欲攻需大軍合以困之四十二年四月繼光將浙兵至於是巡撫譚綸令將中軍顯左大猷右合攻賊於平海繼光先登左右軍繼之斬級二千二百還被掠者三千人綸上功繼光首顯大猷次之帝為告謝郊廟大行叙賚繼光先以橫嶼功進署都督僉事及是進都督同知世廕千戶遂代大猷為總兵官明年二月倭餘黨復糾新倭萬餘圍仙遊三日繼光擊敗之城下又追敗之王倉坪斬首數百級餘多墜崖谷死存

者數千弁據漳浦蔡丕嶺繼光分五哨身持短兵緣崖上俘斬數百人餘賊遂掠漁舟出海去久之倭自浙犯福寧繼光督叅將李超等擊敗之乘勝追永寧賊斬馘三百有奇尋與大猷擊走吳平於南澳遂擊於餘孽之未下者繼光為將號令嚴賞罰信士無敢不用命與大猷均為名將操行不如而果毅過之大猷老將務持重繼光則颺發電舉屢推大寇名更出大猷上隆慶初給事吳時來以薊門多警請召大猷繼光專訓邊卒部

議獨用繼光乃召為神機營副將會譚綸督師遼薊乃  
集部兵三萬徵浙兵三千請專屬繼光訓練帝可之二  
年五月命以都督同知總理薊州昌平保定三鎮練兵  
事總兵官以下悉受節制至鎮上疏言薊門之兵雖多  
亦少其原有七營軍不習戎事而好未技壯者役將門  
老弱僅充伍一也邊寨逶迤絕鮮郵置使客絡繹日事  
將迎叅遊為驛使營壘皆傳舍二也寇至則調遣無法  
遠道赴期卒斃馬僵三也守塞之卒約束不明行伍不

整四也臨陣馬軍不用馬而反用步五也家丁盛而軍心離六也乘漳卒不擇衝緩備多力分七也七害不除邊備曷修而又有士卒不練之失六雖練無益之弊四何謂不練夫邊所藉惟兵兵所藉惟將今恩威號令不足服其心分數形名不足齊其力緩急難使一也有火器不能用二也棄土著不練三也諸鎮入衛之兵嫌非統屬漫無紀律四也班軍民兵數盈四萬人各一心五也練兵之要在先練將今注意武科多方保舉似矣但



此選將之事非練將之道六也何謂雖練無益今一營之卒為礮手者常十也不知兵法五兵迭用當長以衛短短以救長一也三軍之士各專其藝金鼓旗幟何所不蓄今皆置不用二也弓矢之力不強於寇而欲藉以制勝三也教練之法自有正門美觀則不實用實用則不美觀而今悉無其實四也臣又聞兵形象水水因地而制流兵因地而制勝薊之地有三平原廣陌內地百里以南之形也半險半易近邊之形也山谷仄隘林薄

箭翳邊外之形也寇入平原利車戰在近邊利馬戰在邊外利步戰三者迭用乃可制勝今邊兵惟習馬耳未嫻山戰林戰谷戰之道也惟浙兵能之願更予臣浙東殺手礮手各三千再募西北壯士足馬軍五枝步軍十枝專聽臣訓練軍中所需隨宜取給臣不勝至願又言臣官為創設諸將視為綴疣臣安從展布章下兵部言薊鎮既有總兵又設總理事權分諸將多觀望宜召還總兵郭琥專任繼光乃命繼光為總兵官鎮守薊州永

平山海諸處而浙兵止弗調錄破吳平功進右都督寇  
入青山口拒却之自嘉靖以來邊牆雖修墩臺未建繼  
光巡行塞上議建敵臺畧言薊鎮邊垣延袤二千里一  
瑕則百堅皆瑕比來歲修歲圯徒費無益請跨牆為臺  
睥睨四達臺高五丈虛中為三層臺宿百人鎧仗糗糧  
具備令戍卒畫地受工先建千二百座然邊卒本彊律  
以軍法將不堪請募浙人為一軍用倡勇敢督撫上其  
議許之浙兵三千至陳郊外天大雨自朝至日昃植立

不動邊軍大駭自是始知軍令五年秋臺功成精堅雄壯二千里聲勢聯接詔予世廕賚銀幣繼光乃議立車營車一輛用四人推輓戰則結方陣而馬步軍處其中又製拒馬器體輕便利遇寇騎衝突寇至火器先發稍近則步軍持拒馬器排列而前間以長鎗箠笏寇奔則騎軍逐北又置輜重營隨其後而以南兵為選鋒入衛兵主策應本鎮兵專戍守節制精明器械犀利薊門軍容遂為諸邊冠當是時諳達已通貢宣大以西烽火寂

然獨小王子後士默特徙居察罕地控弦十餘萬常為  
薊患而朶顏呼哩狸及其兄子長安交通士默特時叛  
時服萬厯元年春二寇謀入犯馳喜峯口索賞不得則  
肆殺掠獵傍塞以誘官軍繼光掩擊幾獲呼哩其夏復  
犯挑林不得志去長安亦犯界嶺官軍斬獲多邊吏諷  
之降呼哩乃款關請貢廷議給以歲賞明年春長安復  
窺諸口不得入則與呼哩共逼察克圖令入寇繼光禽  
之以歸察克圖呼哩之弟長安叔父也於是二寇率部

親族三百人叩關請死罪呼哩服素衣叩頭乞赦察克  
圖繼光及總督劉應節等議遣副將史宸羅端詣喜峯  
口受降皆羅拜獻還所掠邊人攢刀設誓乃釋察克圖  
許通貢如故終繼光在鎮二寇不敢犯薊門尋守邊勞  
進左都督已增建敵臺分所部十二區為三協置副將  
一人分練士馬綽哈入犯湯克寬戰死繼光被劾不罪久  
之綽哈偕妻德特必濟襲掠邊卒官軍追破之士默特  
犯遼東繼光急赴偕遼東軍拒退之繼光已加太子太

保錄功加少保自順義受封朝廷以八事課邊臣曰積  
錢穀脩險隘練兵馬整器械開屯田理鹽法收塞馬散  
叛黨三歲則遣大臣閱視而殿最之繼光用是頻廢資  
南北名將馬芳俞大猷前卒獨繼光與遼東李成梁在  
然薊門守甚固敵無由入盡轉而之遼故成梁擅戰功  
自嘉靖庚戌諳達犯京師邊防獨重薊增兵益餉騷動  
天下復置昌平鎮設大將與薊相脣齒猶自瀾內地總  
督王忬楊選並坐失律誅十七年間易大將十人率以

罪去繼光在鎮十六年邊備修飭薊門宴然繼之者踵其成法數十年得無事亦賴當國大臣徐偕高拱張居正先後倚任之居正尤事與高確欲為繼光難者輒徙之去諸督撫大臣如譚綸劉應節梁夢龍輩咸與善動無掣肘故繼光益發舒居正歿半歲給事中張鼎思言繼光不宜於北當國者據改之廣東繼光悒悒不得志強一赴踰年即謝病給事中張希臯等復劾之竟罷歸居三年御史傅光宅疏薦反奪俸繼光亦遂卒繼光更



歷南北並著聲在南方戰功特盛北則專主守所著紀  
效新書練兵事實談兵者遵用焉弟繼美亦為貴州總  
兵官有朱先者嘉興人當繼光時為薊鎮南兵營叅將  
遷副總兵後數為廣東福建總兵官初起家武舉募海  
濱鹽徒為一軍自胡宗憲為御史至總督皆倚任先大  
小數十戰皆先登殺倭甚衆以功授都司宗憲被逮先  
解官護行宗憲釋還先乃歸御史按福建巡撫王詢侵  
軍費檄先証之先曰先王公部將也不敢誣府主御史

怒坐先萬金論死繫獄閱八年始白萬厯初用薦起園  
山把總厯登聞帥以年老謝事歸復起辭不赴先為將  
有胆智砥節首公其處宗憲詢二事時論以為有國士  
風

劉顯南昌人生而膂力絕倫稍通文義家貧落魄之叢  
祠欲自經神護之不死間行入蜀為童子師已冒籍為  
武生嘉靖三十四年宜賓苗亂巡撫張臬討之顯從軍  
陷陣手格殺五十餘人禽首惡三人諸軍繼進賊盡平

顯由是知名官副千戶輸貲為指揮僉事南京振武營  
初設用兵部尚書張鏊薦召令訓練擢署都指揮僉事  
僉書浙江都司遷參將分守蘇松倭犯江北逼泗州鏊  
檄顯防浦口顯測賊將遁追擊至安東方暑披單衣率  
四騎誘賊伏精甲岡下賊出斬一人所乘馬中矢下拔  
其鏃射殺追者誘至岡下大敗之去賊出所俘女子盡  
將士顯悉送有司明日伺賊出潛燬其舟賊敗走舟舟  
已焚死者無算顯進秩三等尋遷副總兵協守江浙三

沙倭復劫江北被圍于劉家莊顯以銳卒數千至巡撫  
李遂令盡護江北軍顯率所部直入諸營繼之自辰迄  
酉賊巢破逐北至白駒場茅花墩斬首六百有奇賊盡  
殄而遂謂賊由三沙來實盧鏜及顯罪顯坐停俸已應  
天巡撫翁大立薦顯驍勇請久任帝可之振武營兵變  
後諸將務姑息兵益驕給事中魏元吉薦顯署都督僉  
事節制其軍顯挈蜀卒五百人往一軍帖然聞賊流入  
江西大掠石城臨川東鄉金谿殺吏民萬計詔顯赴勦

擊敗之陽湖賊乃遁四十一年五月廣東賊大起詔顯  
充總兵官鎮守會福建倭患棘顯赴援與叅將戚繼光  
連破賊賊畧盡而新倭大至攻臨興化城顯以兵少逼  
城未敢戰被劾戴罪賊以間攻據平海衛他倭劫福清  
謀與平海倭合顯及俞大猷合於遮浪盡殲之平海倭  
欲遁為把總許朝光所邀敗乃盡焚其舟退還舊屯戚  
繼光亦置顯與大猷共助擊之遂復興化錄功進先所  
廕世職二秩江北倭未平廷議說總兵官于狼山統制

大江南北改顯任之顯行部通州以敕書許節制知府  
以下而同知王汝言不為禮劾奏鐫其秩已移鎮浙江  
顯有將畧居官不守法度巡按御史劾之革任候勘用  
巡撫劉幾薦命充為事官鎮守如故隆慶改元以軍政  
拾遺被劾貶秩視事用巡撫谷中虛薦還故官移鎮貴  
州廣西猥賊者念父子偕稱王攻剽安順巡撫阮文中  
檄顯勦倖斬五百餘人四川巡撫曾省吾議征都掌蠻  
令顯移鎮其地復被劾罷省吾奏留之都掌蠻者居叙

州戎縣介高珙筠連長寧江安納溪六縣間古瀘賊也  
成化初為亂程信守平之正德中普法惡復為亂馬昊  
討平之至是其酋阿大阿二方三等據九絲山剽遠近  
其山修廣而四隅峭仄東北則鷄冠嶺都都寨凌霄峯  
三岡峻壁數千仞有阿苟者居凌霄峯為賊耳目威儀  
出入如王者省吾議討之屬顯軍事起故將郭成安大  
朝為佐調諸土兵合官軍凡十四萬人萬厯改元三月  
畢集叙州誘執阿苟攻拔凌霄進逼都都寨三首遣其

黨阿墨固守官軍頓匝月鑿灘以通漕擊斬阿墨拔其寨阿大自守鷄冠顯令人誘以官而分五哨盡壁九絲城下乘無備夜中腰絙上斬關入遲明諸將畢至阿二方三走保牡豬寨郭成破鷄冠獲阿大諸軍攻牡豬禽方三阿二走追獲於貴州大盤山克寨六十餘獲賊魁三十六俘斬四千六百拓地四百餘里得諸葛銅鼓九十三銅鐵鍋各一阿大泣曰鼓聲宏者為上可易千牛次者七八百得鼓二三便可僭號稱王鼓山顛羣蠻畢



集今已矣鍋狀如鼎大可函牛刻畫有文彩相傳諸葛  
亮以鼓鎮蠻鼓失則蠻運終矣錄功進顯都督同知已  
而勦餘孽復俘斬千一百有奇都掌蠻既滅顯引疾求  
去而以有司阻撓為言詔聽顯節制顯益行其志擊西  
川番沒舌丟骨人荒諸若斬其首惡撫餘衆而還建昌  
傀儡洗馬諸番咸獻首惡西陲以寧九年冬卒官子緹  
自有傳郭成四川叙南衛人由世職厯官蘇松叅將進  
副總兵倭犯通州為守將李錫所敗轉掠崇明三沙成

擊沈其舟斬首百三十餘級慶隆元年冬擢署都督僉  
事為廣東總兵官渡海追曾一本大獲進署都督同知  
叛將周雲翔等殺叅將耿宗元亡入賊中屯平山大安  
峒將寇海豐成偕南贛軍夾擊之斬首千三百餘級獲  
被掠通判潘槐而下六百餘人生繫雲翔潮州諸屬邑  
賊巢以百數郭明據林樟胡一化據北山洋陳一義據  
馬湖剽劫二十載成督諸軍擊殺明等俘斬千三百有  
奇四川都掌蠻為亂詔成移鎮尋被劾罷歸萬厯改元

命劉顯大征詔成充為事官為之副先登九絲山生繫  
阿大初成父為蠻殺乃以所斬首級及生禽諸蠻置父  
墓前剖心致祭鄉人壯之尋僉書南京後府出為貴州  
總兵官鎮守銅仁成有膽智每苗出掠潛遣壯士入其  
砦斬馘而出嘗挺身入林箐察賊苗一日數驚曰郭將  
軍至矣相戒莫敢犯復被劾罷歸起四川總兵官永寧  
宣撫奢效忠卒其妻奢世統無子妾奢世續子崇周幼  
前總兵劉顯因命世續署宣撫印世統怒攻奪其落紅

寨世續奔永寧成遣義兒郭天心偕指揮禹嘉續按問  
天心遂據世續永寧私第罄取其資而成亦入落紅盡  
掠奢氏九世之積效忠弟沙卜遂拒殺裨將三人執天  
心等撫按交章劾成下吏遣戍雲南會有松茂之後薦  
從軍成乃將七千人直抵黃沙屢破賊與總兵官李應  
祥盡平河東西諸巢以功授叅將復偕應祥大破賊乃  
諸賊增世職二級賊乃黨楊九乍復出為亂成討平之  
霍落齊擾西寧四川巡撫李尚思以地近松潘檄成軍

松林游擊萬鏊軍漳臘寇不敢逼西陲獲安楊應龍叛  
成進討無功戴罪辦理尋卒於官

李錫欽人世新安衛千戶倭警數有功為通州守備屢  
擢揚州叅將江北副總兵隆慶元年冬以署都督僉事  
為福建總兵官海寇曾一本橫行閩廣間俞大猷將赴  
廣西總督劉燾令會閩師夾擊一本至閩錫出海禦之  
與大猷遇賊柘林澳三戰皆捷賊遁馬耳澳復戰會廣  
東總兵官郭成率叅將王詔等以師會次萊蕪澳分三

哨進一本駕大舟力戰諸將連破之燬其舟詔生禽一本及其妻斬首七百餘死水火者萬計時廣寇惟一本最强錫大猷成共平之而錫功最鉅其後一本餘黨梁本豪復亂為黃應甲所禽然視錫時力較易錫論功加畧都督同知倭入寇擊却之六年春以征蠻將軍代大猷鎮廣西平樂府江者桂林抵梧州驛道也南北亘五百里兩岸崇山深箐賊巢盤互自嘉靖間張岳破平後至是復猖獗嘗執知州邀重賄道路梗塞城門晝閉大

猷議討之會罷官去巡撫郭應聘與錫計徵兵六萬令  
叅將錢鳳翔王世科都指揮王承恩董龍各將一軍以  
副使鄭茂金杜僉事夏道南監之錫居中節制破賊巢  
數十斬馘五千有奇擄酋楊錢甫等悉授首錄功進世  
職二等柳州懷遠徭獞矜狃環居之徭尤獷悍侵據縣  
治久吏民率寓郡城隆慶時大征古田諸徭懼而聽命  
知縣馬希武之官繕城塹程後過嚴諸徭殺希武及經  
厯等五人復反巡撫應聘與總督殷正茂議征之萬厯

元年正月錫進次長安鎮會連雨雪乃退師益徵浙東  
烏銳手胡廣永順鈎刀手及狼兵十萬人令叅將鳳翔  
世科都指揮楊照威繼美故叅將亦孔昭魯國賢六道  
並進監以副使沈子木錫自統水師次羅江獨當其衝  
時賊屯板江大洲累石樹柵潛以舟來襲錫伏舟敗之  
水陸並進會鳳翔等亦至賊悉舟西遁追擊連破數巢  
賊據楓木大山前阻隄澗鼓譟出諸軍奮擊而別以奇  
兵繞其後賊大奔保天鵝嶺錫以水軍截潯江督諸將



攻斬渠魁二人乘勝復破數巢直抵清州界賊奔大巢  
亘數里崖壁峭絕為重柵拒官軍標弩矢石雨下婦人  
裸體揚箕擲牛羊犬首為厭勝諸軍大呼直上四面舉  
火賊盡殲先後破巢一百四十獻馘三千五百有奇俘  
獲撫降者無算永福永寧柳城并以賊告洛容獐又殺  
典史錫令王端討永寧柳照討柳城叅將門崇文討永  
福亦孔昭討洛容已帥舟師屯理定江節制諸軍甫二  
旬四道並捷斬首四千五百有奇洛容賊首陶浪金等

俱伏誅錫以功進秩二等巡按御史唐諫言錫一年內  
破賊二百一十四巢獲首功一萬二千餘級宜久其任  
帝可之尋從凌雲翼大破羅旁賊授世廕百戶六年卒  
官黃應甲者不知何許人隆慶中以潯梧左叅將從俞  
大猷討平韋銀豹進秩二等萬曆五年屢遷浙江總兵  
官改鎮廣東龍川鮑時秀者妻杜氏有妖術乃據義都  
維嶺立二十四方大總自號無敵峒王既降復反應甲  
討平之蟹戶蘇觀周才雄照亡命數千人縱掠雷廉

間殺斷州千戶田治應甲率五軍並進生禽觀陞才雄  
斬首四百餘級其黨縛酋長陳泉以降未幾梁本豪亂  
本豪故曾一本黨亦蠶戶也一本誅竄海中習水戰遠  
通西洋且結倭兵為助殺千戶掠通判以去十年六月  
總督陳瑞與應甲謀分水軍二南駐老萬山備倭東駐  
虎門備蠶別以兩車備外海兩軍扼要害水軍沈蠶舟  
二十生禽本豪諸軍競進大破之石茅洲賊復奔潭洲  
沙灣聚舟二百及倭舟十相持角諸將合追先後俘斬

千六百有奇沈其舟二百餘撫降者二千五百帝為告郊廟大行叙賚應甲等進秩有差他倭寇瓊崖應甲斬首二百餘奪其舟再賜金旋入僉左軍府罷歸卒尹鳳字德輝南京人錫總兵福建時步將也世府軍後衛指揮同知鳳早孤讀書嫺騎射嘉靖中舉武科鄉會試皆第一擢署都指揮僉事備倭福建徙僉浙江都司進福建叅將倭陷福清南安連舫出海鳳邀擊沈其七舟追至外洋連戰許嶼東洛七礁禽斬二百人擊倭梅花洋

走之追至橫山禽斬二百六十大小凡十數戰內地賴以稍寧改掌浙江都司謝病歸隆慶初以故官沲福建從錫平曾一本萬厯初累官署都督僉事提督京城巡捕未幾謝事歸

張元勳字世臣浙江太平人嗣世職為海門衛新河所百戶沈毅有謀值倭警隸戚繼光麾下有功進千戶從破橫嶼諸賊屢進署都指揮僉事充福建游擊將軍隆慶初破倭福安改南路叅將從李錫破曾一本進副總

兵五年春擢署都督僉事代郭成為總兵官鎮守廣東  
惠州河源賊唐亞六廣州從化賊萬尚欽韶州英德賊  
張廷光劫掠郡縣莫能制明年元勲進勦斬馘六百有  
奇亞六等授首餘黨悉平肇慶恩平十三村賊陳金鶯  
等與鄰邑苔村三巢賊羅紹清林翠蘭譚權伯藤峒九  
逕十寨賊黃飛鶯邱勝富黃高暉諸可行黃朝富等相  
煽為亂故事兩粵惟大征得叙功勲不叙故諸將不  
樂鵬巢總督啟正茂與元勲計令鵬勦得論功諸軍爭

奮正茂又密遣副將梁守愚游擊王端等屯恩平若常  
戍者掩不備斬翠蘭等生禽紹清權伯以獻其諸路鵬  
勦者効首功二千四百有奇還被掠子女千三百餘人  
生得金鶯惟高暉等亡去元勲逐北至藤峒又生獲勝  
富可行朝富等八十人部將鄧子龍等亦獲高暉飛鶯  
三巢十塞十三村諸賊盡平餘悉就撫惠潮地相接山  
險木深賊首藍一清賴元爵與其黨馬祖昌黃民太曾  
廷鳳黃鳴時曾萬璋李仲山卓子望葉景清曾仕龍等

各據險結砦連地八百餘里黨數萬人正茂議大征會  
金鶩等已滅諸賊頗懼廷鳳萬璋並遣子入學祖昌景  
清亦佯乞降正茂知其詐徵兵四萬令叅將李誠立沈  
思學王詔游擊王瑞等分將之元勲居中節制監司陳  
奎唐九德顧養謙吳一介監其軍數道並進賊敗乃憑  
險自守官軍遍搜深箐邃谷間而元勲偕九德追亡至  
南嶺一日夜馳至養謙所擊破李坑生得子望等明年  
破烏禽嶂仕龍阻高山元勲佯飲酒高會忽進兵擊禽



之先後獲大賊首六十一人次賊首六百餘人破大小巢七百餘所禽斬一萬二千有奇帝為宣捷告郊廟進元勲署都督同知世廕百戶元勲復討斬餘賊千三百有奇撫定降者巨寇皆靖潮州賊林道乾之黨諸良寶既撫復叛襲殺官軍掠六百人入海再犯陽江敗走乃據潮故巢居高山巔不出戰官軍營於泥中副將李誠立挑戰墜馬傷足死者二百人賊出掠而敗走巢固守元勲積草土與賊壘平用火攻之斬首千一百餘級時

萬曆二年三月也捷聞進世廕一級遺尊魏朝義等四  
巢亦降尋與胡宗仁共平良寶黨林鳳惠潮遂無賊其  
冬倭陷銅鼓石雙魚城元勲大破之俘峒倭斬八百餘  
級進秩為真五年從總督凌雲翼大征羅旁賊斬首萬  
六千餘級進都督改廕錦衣尋以疾致仕卒於家元勲  
起小校大小百十戰威名震嶺南與廣西李錫並稱良  
將

贊曰世宗朝老成宿將以俞大猷為稱首而數奇屢躋

以內外諸臣攘敗而掩過其功者衆也戚繼光用兵威  
名震寰宇然當張居正譚綸任國事則成厥後張鼎思  
張希臯等居言路則廢任將之道亦可知矣劉顯平蠻  
引疾而以有司阻撓為辭有以夫李錫張元勲首功甚  
盛而不蒙殊賞武功所由不競也



明史卷二百十二

欽定四庫全書

明史卷二百十二考證

俞大猷傳平安南范子儀之變

臣章宗瀛按趙恒志

所撰俞大猷行狀當大猷出廉時廉守餞大猷舉酒  
曰如將軍策可幾時班師大猷曰吾行四十日當會  
已與言符傳中未及謹附考

俞大猷傳從總督張經破賊于王江涇

臣章宗瀛按

嘉靖三十五年五月張經敗倭于王江涇時趙文華

與巡按御史胡宗憲相比趣經進兵經以狼兵初集  
永順保靖兵未至欲俟其至而後戰文華等劾經養  
寇失機疏方上而兵至經遂大破倭于王江涇為軍  
興戰功第一文華等冒其功明帝以前疏逮經下獄  
冬十月殺之見今獻備遺謹附考

俞大猷傳四十二年與戚繼光復興化城共破海倭是  
冬徙鎮南贛按是時倭既犯淮揚吳越皆不利遂巢  
閩中破城十餘殺官吏軍民不可勝紀時大猷為總

兵威繼光為副擊破之閩惠少熄詳明實錄謹附考

臣章宗瀛按戚繼光傳與大猷破倭在四十二年四月蓋至十月而大猷移鎮南贛傳以四十二年屬之移鎮紀叙未明擬移于擢福建總兵官下而改十月作是冬于字數亦合謹識

俞大猷傳負奇節以古賢豪自期

臣章宗瀛按趙恒

志大猷行狀言大猷入蒲時駐兵平海興泉二郡供給不至海運亦絕大猷令毀屋為營采麥而食衆心

乃定所著書有正氣堂集及劔經射法戰車續武經  
總要百餘卷中未及謹附考

戚繼光傳父景通有操行

臣章宗瀛按識大錄劉瑾

有逆謀知景通豪傑遺之蓆帽景通佯應之繼乃為  
黃冠遁去謹附考

戚繼光傳嘉靖四十年倭丁掠桃渚圻頭

臣章宗瀛

按圻頭倭起繼光率精銳一千五百人計二旬有九  
日九接戰斬首一千獲兵仗三千七百有奇時號戚



家新兵所至破竹詳見識大錄謹附考

戚繼光傳弟繼美亦為貴州總兵官

臣章宗瀛按繼

光有妻無子性悍諸姬得子養之外舍然繼光嘗出鎮擊賊賊乘虛來襲妻部勒登陴城竟得完見識大

錄謹附考

劉顯傳伺賊出潛燬其舟

臣章宗瀛按黃姬水淮上

戰功序顯選人持火器焚賊船又援桴誓衆執一幟以號于衆有能殺賊樹功者立幟下得三百人為後

勁又命甲四十一人巡守六十人分伏又命三巨艦  
燔賊賊大潰傳中未詳載謹附識

劉顯傳萬厯九年冬卒官

臣章宗瀛按識大錄云顯

身不滿七尺不胄不介著一白布單衣如小丈夫及  
遇敵提刀騰躍超踊見刀不見身軍中稱神人謹附  
考

李錫傳從俞大猷討平韋銀豹

臣章宗瀛按韋銀豹

廣西桂林府古田縣獐也獐種甚繁曰韋曰閑曰白

後皆併于韋景泰間韋朝威據古田屢撫輒叛至銀  
豹與其伯朝猛攻陷洛容還據古田分其地詳見朱

國楨記謹附考

明史卷二百十二考證